



## Penerbit UMP, MATDUM bakal terbit buku kompilasi kes tatatertib

Oleh: SHALFARINA SHAHRIMAN

Majlis Tatatertib dan Disiplin Pelajar Universiti Malaysia (MATDUM) bakal menerbitkan Buku Kompilasi Kes Tatatertib dan Disiplin Pelajar Universiti Awam (UA) pada Jun 2016 ini.

Buku yang akan digunakan oleh pelajar baharu UA sesi 2016/2017 itu adalah bagi memudahkan mereka untuk memahami dengan lebih jelas kes dan tindakan yang akan diambil sekiranya melanggar peraturan yang ditetapkan oleh universiti.

Ketua editornya yang juga merupakan Pengarah Penerbit UMP, Profesor Madya Dr. Mohd Ghani Awang berkata, buku ini mengandungi koleksi kes yang pernah dilakukan pelajar dan tindakan yang diambil oleh universiti terhadap kesalahan berkenaan.

"Sebagai contoh, kes pelajar meniru ketika peperiksaan dan menerima hukuman seperti digantung semester. Idea untuk menerbitkan buku ini bukannya untuk menakutkan pelajar tetapi sebagai peringatan yang jelas terhadap kesalahan yang dilakukan.

"Editorial buku ini terdiri daripada Naib Canselor UMP, Profesor Dato' Dr. Daing Nasir Ibrahim sebagai penaung, Timbalan Naib Canselor (Hal Ehwal Pelajar & Alumni), Profesor Dato' Dr. Yuserrrie Zainuddin sebagai penasihat dan diketuai oleh Penolong Pegawai Penasihat Undang-undang Universiti Sains Malaysia (USM), Masmadhanur Aslinda Mohd Ali sebagai Pengerusi Jawatankuasa Penerbitan serta wakil Universiti Teknologi MARA (UiTM), Universiti Islam Antarabangsa Malaysia (UIAM), Universiti Malaysia Terengganu (UMT), Universiti Malaysia Kelantan (UMK), Universiti Utara Malaysia (UUM), Universiti Malaysia Perlis (UniMAP), Universiti Tun Hussien Onn Malaysia (UTHM), dan Universiti Malaysia Sabah (UMS) sebagai editor," katanya.

Beliau berkata demikian ketika bengkel penerbitan buku berkenaan di Universiti Kebangsaan Malaysia (UKM), Bangi pada 11 April 2016 yang lalu.

Mohd Ghani berkata, sebelum ini, bengkel penerbitan buku itu juga turut diadakan di Terengganu bagi membincangkan kaedah penulisan yang bersesuaian dan hasil daripada itu, jawatankuasa bersepakat menggunakan sepenuhnya konsep Format Ghani kerana dapat memudahkan pelajar memahami kandungannya dengan lebih jelas dan tersusun.

Katanya, penggunaan buku ini juga adalah salah satu inisiatif MATDUM dalam menangani masalah disiplin yang berlaku dan sekaligus mengurangkan kadar salah laku pelajar di universiti.

MATDUM adalah salah satu majlis di bawah Sekretariat Timbalan-timbalan Naib Canselor dan Rektor (Hal Ehwal Pelajar) UA dan bertanggungjawab menyelaraskan kes serta prosedur berkaitan tatatertib dan disiplin pelajar.